




Manuscripti instar, ad usum Nostrorum tantum

## Quomodo Regulae Congregationis applicandae sint locorum varietati

Quidam Noster ex Jugoslavia, vir magna auctoritate rerumque sodalitarum usu insignis, literas ad nos dedit de modo quo Regulae Congregationis a R. P. Wernz editae adaptandae essent locorum indoli ac temporum.

"Magna incommoda excitantur - inquit - eo, quod consuetudines Sodalitatum nostrarum, imo ut scio mediae fere Europae, omnino cum Regulis istis non congruunt. Cum enim Regulae saepe in particularia omnino descendant, atque in res quae nec possunt nec debent ubique eodem modo observari, difficultas oritur inde summa, quod Sodales atque ipsi Candidati vilipendant Regulas vel certe tamquam non sibi datas illas aspiciant, quippe a quibus ipse Sodalitatis usus modusque passim descendant.

"Sit exemplo *Regula 5* R. P. Wernz, qua dicitur "expedire ut conventus... habeatur singulis *diebus dominicis*" et festis. Iam apud nos, sed ut scio, etiam in multis aliis regionibus conventus non die dominica fiunt, e contra fere nusquam die dominica, sed per hebdomadam. Nam die dominica clerus occupatissimus est, nec specialibus exercitiis Sodalitatis vacare, seve a populi cura abstrahere potest. Sed neque Sodales videntur retinendi a communibus parochiarum vel aliorum templorum devotionibus cum detrimento aedificationis publicae. Si vero utrique interesse deberent: exercitiis inquam pietatis et publicis et sodalitiis, nimium ab eis postularetur. Attendendum id quoque est, diem dominicam in maioribus urbibus et inter homines laboribus obrutos diem unam esse, qua quis quietius familiam colere vel rus excurrere possit; quibus rebus Sodales profecto non sunt privandi. Adde quod si conventus dominica die una cum Missa habetur, difficile

apparet servare praeter mera pietatis exercitia alias quoque Congregationis consuetudines: consultationes, Academias, Sectiones, Candidatorum instructiones, discussiones sive apologeticas sive apostolicas; nisi Sodales per horas ieiuni contineantur. Venire igitur deberent ad istas exercitationes per hebdomadam iterum, fierentque conventus duo per hebdomadam; id quod nimium est, imo per itinerum longitudines variasque Sodalium occupationes saepe fieri nequit.

"Alia exempla: In ordine Conventus hebdomadarii supponi omnino videtur, conventum in sacello vel templo esse habendum; dicitur etiam legendus liber pius dum Sodales congregantur. Contra apud nos in loco aliquo apto praeter sacellum convenire Sodales solent atque familiariter inter se agere, donec signo dato ad sacellum se omnes conferant. Habetque ista ratio emolumenta maxima; sic enim Sodales sese cognoscunt, apostolicis actionibus simul incipiendis colloquendo praeludunt. Imo experientia duce asserere audeo, ubi occasio ad familiarem eiusmodi colloquutionem dari Sodalibus non solet, raro esse Congregationem aliud quam precatoriam unionem, nulla fere sociali necessitudine aut apostolatus collectivi vinculis connexam. — Consultorum numerus (12) saepe nimius apparet. — Preces vespertinae Regula 34 commendatae apud nos vix servantur; contra vero saepe servatur et a multis praefertur recitatio actus consecrationis "Sanctissima Virgo" vespere, antequam cubitum eatur. — Pecunia Congregationis raro est apud nos penes Depositarium, propter obvias rationes, sed penes Procuratorem domus. — Regulis 60 et 61 bini "saltem" Sacristae binique "vel plures" Punctatores praescribuntur, quod apud nos raro obtinet, neque



necessarium videtur. — Regula 65 dicitur “ officia tum maiora tum minora consignata his statutis *communia esse omnibus* Sodalitatibus ”. At quoties desunt e. g. Visitatores infirmorum (e. g. in Collegiis) vel Bibliothecarii (ubi bibliothecae non sunt neque ob penuriam institui possunt) etc.

“ Dicitur utique Regulis localibus providendum esse peculiaribus loci ac temporis rationibus. Sed quid, ubi Regulae locales evertere fere deberent omnia particularia Regulis Communibus exhibita? ”

Sic Pater ille, qui etiam putat revisione Regularum Communium opus esse, ut ea tantum contineant quae ubique aequae servari possint; reliquis pro Directorio aliquo vel pro Regulis localibus reservatis.

### Respondendum:

Res certe magni momenti est. Sed ut statim dicamus: solutio difficultatis iusta non ea est quae ultimis his verbis erat proposita. Verum est utique Regulas R. P. Wernz, ubi ad particularia descendunt, non ubique eodem modo posse servari. Sed hoc ne ipsis quidem his Regulis postulatur. Plenae enim sunt hae Regulae indicationum: “ ubi mos est ”, “ bene esset ”, “ ordinarie... ita esse solet ”, “ quantum poterit ” etc. Quae locutiones, quamvis non apud singulas Regulas repetantur, *generalem tamen indolem Regularum* exhibent, quae ea est, ut *prudentem applicationem et adaptationem ad locorum temporumque rationes non solum non excludat, sed etiam suadeat*. Regulae enim illae directivae magis sunt quam praeceptivae. Nec facile alia via incedendum Regularum conditoribus erat. Si enim ea sola statuissent, quae apud omnes omnino Sodalitates deduci in usum uniformiter possent, nimis siccos tantum et aridos quosdam articulos edidissent omni vita et colore privatos, quales paragraphi iuristarum esse solent. Praefenda igitur videbatur ea agendi ratio, ut Regulae quaedam satis particulares, sed directivae tantum (ut plurimum) conderentur, essentque veluti *exemplar quoddam seu specimen* (modèle), quo natura atque operatio, constitutio atque vita Sodalitatum una veluti norma exhiberentur. Quare etsi quoad res multas particulares magis Congregationis Barcinonensis usus prae oculis habent, facile et iure adaptantur usui patrio. Neque adest revisionis novae ratio, quae non careret novis perturbacionibus et incommodis; maxime cum hae Regulae satis generatim iam et cum plausu ut normae sint receptae, imo aliquibus regionibus ab ipso Episcopatu tamquam exemplar praescriptae.

Practice igitur, ut difficultatibus a Patre illo advocatis (et verissimis!) obviam eatur, omnino curandum est, ut Directores *naturam normativam et directivam* Regularum Communium clare Soda-

libus evolvant et iam Candidatis explicari curent. Non erit dicendum: “ Haec Regula apud nos non observatur ”, sed magis: “ Haec Regula Communis apud nos hoc modo observatur ” vel “ ob loci indolem sic modificata servatur ”. — Deinde Regulae locales (servatis servandis) opportune adduntur Regulis communibus et Sodalibus explicatur earum ad has relatio. Sic difficultas ex admiratione orta fere evanescet.

Notare tandem liceat, vigorem Sodalitatum non unice scriptis legibus contineri. Vir Angliae primarius, cum a quodam audiret leges Anglorum veteratas omnino et ineptas esse, sic respondit: “ Et tamen nos his legibus servatis prospere omnino per multa saecula viximus ”. Simile quid in Sodalitate obtinet. Licet enim aliquando statuta nostris necessitatibus verbotenus minus appositae appareant, iis tamen prospere omnino uti poterimus, si Congregationis veram indolem ex iis elucentem omni impensa coluerimus.

## De Congregationibus puerorum

Disputatur inter Directores et rei peritos, utrum aperienda Congregatio Mariana pueris sit, pueros infra 14 fere annos intelligendo, an reservanda adolescentibus maturioribus, virisque feminisque. Agitata haec quaestio est praesertim in Austria, ubi satis multae per urbes maiores puerorum Sodalitates vigent. Mordicus alii obstrepuerunt, fortiter alii partes puerorum defendendas susceperunt.

Videamus rationes *pro* et *contra* circa hanc rem.

### Rationes pro.

Rationes Congregationibus puerorum faventes hae fere sunt:

1<sup>o</sup> *Ex conceptu et natura Congregationis*. Congregatio est associatio Mariana sanctiori vitae prosequendae et apostolis formandis dedita. Atqui omnium harum rerum capaces sunt etiam pueri puellaeque 10-14 annos nati. Cur igitur excludantur?

2<sup>o</sup> *Ex rerum usu et experientia*. Reapse Congregationes puerorum vigent pluribus in locis, fructusque edunt omnino bonos. Utique in solis fere maioribus urbibus, ubi satis praecox est ipsa prima adolescentia et pueri 10-14 annorum optime intellegunt, de quam re in Congregatione agatur. Partem sumunt in ipsa consultatione, opera non omnino spernenda apostolatus (maxime inter socios scholae) tentant etc. Ruri utique haec nequaquam generaliter dici possunt. — Ex alia parte, nisi mature in Congregationem admittantur, timendum est, ne primum innocentiae florem



facile amittant, utque postea Congregationi adscribi cupiant. -- Fertur magna pars (fere 80 pro cent.) Sodalium puerorum perseverare et congregationi fidem servare transeundo postea ad Sodalitatem congruam, sive iuvenum, sive virginum. — Tandem etiam societates anticatholicae et indifferentes omnia movent tentantque ut nova societatis humanae soboles quam primum suos sucos imbibat, suisque hortis adolescat. Si nos elabi e manibus teneram aetatem passi erimus, errorem morae magnis detrimentis luemus.

3<sup>o</sup> *Ex auctoritate*. Sunt certe viri magnae auctoritatis circa Sodalitatum usum (e. g. P. Georgius Harrasser), qui vehementius puerorum Congregationes, utique in solis maioribus urbibus, urgeant. Provocant ad ipsum Leunium, Sodalitatis primae patrem, qui Congregationem inter homunciones infimae grammaticae classis conglutinaverit.

### Rationes contra.

Opponunt tamen alii alia et anceps haeres, utrinam ex disputatis partibus consentiendum discernas. Inquiunt enim, nec sine grano nucleove:

1<sup>o</sup> *Ex natura Congregationis* abstracte spectatae utique etiam pueri capaces sunt, aliquomodo certe, finis qui Sodalitati propositus est; in concreto tamen verus usus veraque aestimatio rerum, quae in Congregatione agi solent, maturiorem aetatem animumque requirunt, neque permittendum est, ut res istae, e. g. consultationes, Sectiones etc., fere ludi instar gerantur.

2<sup>o</sup> *Ex usu et experientia*. Timendum enim est atque omnino cavendum, ne Congregatio in communi aestimatione tamquam res puerilis deprimatur. Iam satis amisit bonam famam Congregatio, — sic inquiunt — quod a mulieribus virginibusque nimis occupata apparet; atque in nationibus integris viri repudiant Sodalitatem, quod eam pro pio feminarum adolescentiumque conventiculo habent. An augere hanc difficultatem volumus, Sodalitatem infantibus aperiendo? Psychologia igitur duce resiliendum ab hoc consilio videtur. — Adde momentum Congregationis pretiumque facile sic deprimi in ipsa puerorum aestimatione; si enim eam pueris quoque adaptari viderint, nec maturiori aetati reservatam, prout erunt ed eam simul cum puerilibus moribus abiiciendam. — Tandem: undenam sumemus Sacerdotes ac Directores, si ad ipsam primam adolescentiam formandam singulos Directores labore illo non exiguo obruimus, qui ad gubernandam Sodalitatem requiritur?

3<sup>o</sup> *Auctoritati auctoritatem* opponere licet; sunt autem certe multi Directores praeclari, qui Congregationem pueris aperiri vetent. Qua in re ipsum maiorum nostrorum exemplum adduci in contrariam partem potest; neque enim moris erat antea pueros in Sodalitatem Marianam adducere, verum

peculiares coetus pro illis instituebantur (e. g. Angelorum Custodum vel S. Joannis Berchmans etc.) ad meliores meliore virtutis ac pietatis amore colendos, Congregatione Mariana pleniori aetati reservata.

### Quaenam iusta solutio?

Salvo meliore iudicio nobis felicior quaestionis solutio in distinctione iam indicata videtur posita esse. Generatim enim loquendo Sodalitatis portae ob rationes allatas pueris 14 annos nondum natis iuste vetantur. Ubi tamen, ut in urbibus maioribus, et praecocior rerum intellectus apud iuniores maturescit, et periculum ex mora imminet, non est cur nimis anxie annos adolescentium scrutemur. Sed etiamsi pueris Congregationem aperiimus, consultius apparet, coetum illum alio nomine (e. g. Angelorum Custodum) ornari, nomine et decore Congregationis proveciori paululum aetati (14 annorum) servatis. Nihil tamen obest quin etiam in his coetibus exercitia spiritumque Congregationis, et inprimis seriae virtutis studium ac B. Virginis amorem praecipuum, indoli puerorum convenientius colamus, simili utique ratione ac fit in Congregatione.

Quid vobis: clarissimi Lectores, hac in causa videtur?

## QUAESTIONES PRACTICAE

**De effectu iuridico suspensionis.** Quaerit Pater quidam: Solent Directores simul cum Consilio aliquando punire Sodalem refractarium vel neglegentem poena "suspensionis", maxime in Sodalitatibus adolescentium vel puellarum. Iam quaero: quinam sint effectus iuridici talis suspensionis? Excluditur Sodalitis "sensus" ad tempus a conventibus, a voce activa et passiva, similibus. Sed estne exclusus etiam a privilegiis et indulgentiis Congregationis?

*Respondemus:* negative; nisi Director per suspensionem intendat Sodalem e Congregatione proprie *dimittere* et post aliquod tempus iterum proprie admittere. (Quo in casu in nova admissione observandum est id quod ad validitatem admissionis Reg. 28 requiritur). Generatim tamen suspensio sola iura socialia Sodalitis suspendit (non: tollit), non indolem ipsam seu characterem sodalitium. Director potest Sodalem *dimittere*, sed nisi hoc faciat, non potest ei usum indulgentiarum iuraque a S. Sede Sodalibus data adimere.

**De loco distincto Praefecto et Assistantibus in conventibus reservando.** Quaerit Pater aliquis: Apud nos solent sedes distinctae in conventu reservari Praefecto et duobus Assistantibus, ut sancta aemulatio tali distinctione excitetur et bonum exemplum eorum magis proluceat. Estne hic usus ubique communis et commendandus?



*Respondendum*: Videtur usus satis communis et rectus esse, ut Praefectus et Assistentes primos locos in conventibus occupent, ut eorum dignitas etiam sic extollatur. Aliquando etiam Consultores sedes ceteris eminentiores habent; aliis tamen locis hi reliquis Sodalibus intermiscuntur, qui mos suo emolumento non caret. Per se praestat, ut Candidatis et Postulantibus ultimae sedes secundum Sodales approbatos tribuantur, ut etiam hac ratione ab his distinguantur et appareat eos nondum ad corpus Congregationis pertinere.

**De dimissionibus ob minorem successum studiorum factis in Collegiis.** Scribit Pater quidam: In aliquo Collegio mos est, ut ii qui ex Sodalitate minore in classes superiores ascendunt, post aliquod tempus, si interim bene se gesserint, in Sodalitatem maiorem admittantur. "Si interim bene se gesserint": id sibi vult, ut ex disciplina domestica et diligentia "notam primam", in studiis ipsis notam "satis bonam" ut minimam accipiant. Nisi hoc obtineat, suspensi, imo post alterum semestre dimissi censentur. Iam si haec regula stricte servatur, obtinet 1<sup>o</sup>: ut non Director, sed indirecte Praefectus vel Subpraefecti disciplinae decernant, utrum quis in Sodalitate retinendus sit necne; 2<sup>o</sup> saepe iniuste praeponuntur discipulis satis assiduis sed minus acri ingenio praeditis illi qui facili labore studia superant; aut natura mites et taciturni iuvenibus turgidis et vivacibus, sed ceteroquin optimis. Severos nos esse utique oportet in admissione, sed non nimis severos in dimissione; haec enim saepe multum nocet vitae religiosae iuvenum. Quid ad casum?

*Respondemus* nostra opinione omnino iustam esse observationem superius exhibitam. Quod enim ad dimissionem spectat, certe res gravis est aliquem expellere e Congregatione, quare caute omnino procedendum est, nec Directori Subpraefecti substituendi. Recte hic adhibetur illud Ovidii:

*Cuncta prius tentanda; sed immedicabile vulnus  
Ense recidendum est, ne pars sincera trahatur.*

Quod vero attinet ad felicem in studiis profectum, qui non semper a diligentia sola pendet, alterum illud Horatii meminisse iuvenit:

*Non cuivis homini contingit adire Corinthum.*

Quare videtur melius esse, ut admissio et conservatio Sodalium in Congregatione magis iudicio prudenti Directoris relinquatur, qui tamen omnia bene considerabit et certe etiam iudicii Professorum et Praefectorum rationem prudenter habebit.

**Historia Congregationum B. M. V. desideratur.** Scribit Pater quidam: "Historia Congregationum B. Virginis ad consultationem apta desideratur. Sicut scripsit R. V. quatuor articulis in "Acie" brevem conspectum historiae Congregationis, utinam integram aliquis scribat! Nonne suscitabit B. Virgo evangelistam suarum Congregationum?"

Cui voto omnino accedendum videtur.

Prodeunt his diebus editione altera tres numeri "*Silvae Marianae*", Pretium singulis est 1 lib. ital., 10 exempl. simul L. 8, 100 exempl. L. 70.

## CHRONICA

**Error corrigitur.** Nefastus error et procul dubio execrandus in aggregationum numeros pg. 10 huius anni exhibitos irrepsit. Dicebamus enim ibi aggregationum per Hispaniam anno proxime delapso factarum numero *regressum ostendi*; cum vero contra, progressum notabilem aggregationes exhibeant. Neque enim a 53 ad 19 decrevit numerus, sed a 19 ad 53 auctus est. Cuius igitur erroris veniam, data cervice, petimus.

**Belgium.** *Coetus pro sacerdotibus saecularibus de Congregationibus. Novus libellus periodicus.* — Labente anno 1925 habiti sunt in parte flandrica Belgii, approbantibus Episcopis, coetus eorum sacerdotum e clero saeculari, qui congregationibus puellarum in parochiis praesunt. Quamvis plurimae essent in hac regione tales Sodalitates Primae Primariae aggregatae, nihil tamen unquam tentatum fuerat, ut reformarentur, foverentur, aptius dirigerentur vel ad altiora promoverentur. Non magna ergo habenda erat expectatio: ex eventu probandum erat, utrum saeculares sacerdotes zelum valde promptum ostenderent, an contra, nescio quam diffidentiam et timorem de immixtione Nostrorum in res parochiales conciperent. Omnia tamen, Deo favente, prospere cesserunt et eximio cum emolumento Congregationum,

Aderant in quinque locis, ubi conventus illi — per unum diem — sunt celebrati, sacerdotes simul numero fere 275. Praesidebant singulis coetibus primarii viri e clero saeculari, et in diocesi Brugensi Episcopus ipse, qui Congregationibus valde favet; Gandavensis quoque Episcopus certo ipse in urbe sua coetui adfuisse, nisi morbo fuisset impeditus. Etiam Em. Cardinalis Archiepiscopus Mechliniensis (piae memoriae Card. Mercier) et Episcopus Leodiensis magnum fervorem et benevolentiam exhibuerunt.

In omnibus coetibus de iisdem quaestionibus actum est, nempe:

- A) *De fine et natura Congregationum,*
- B) *De directione et gubernatione Congregationum,*
- C) *De ortu, vita et progressu Congregationum,*
- D) *De influxu Congregationum religioso, morali et sociali.*

De his omnibus materiis parochi praevie designati (inter quos nonnulli decani) apte disseruerunt, compendium illud evolventes, quod Secretarius Congregationum Provinciae nostrae — ad vitandam nimiam ipsis molestiam simulque ad unitatem obtinendam — ipsis proposuerat. Post singulas elucubrationes libenter suam quisque dixerunt sententiam.

Commoda plura ex hisce coetibus orta sunt. Erant multis quasi revelatio quaedam de ipsa essentia Congregationum; melioribus, augmentum zeli sacerdotalis; omnibus, sincerum desiderium obtinendi maiorem inter omnes Directores et ipsas Congregationes cohaesionem; Secretario tandem nostro, optima opportunitas vivendi et alloquenti Directores e clero saeculari.

Praeclarus effectus horum coetuum etiam ille fuit, ut summa utilitas, imo necessitas demonstrata sit alicujus Periodici, quod ad solos dirigeretur sacerdotes, et non



puellarum solummodo Congregationes, sed omnes omnino flandricas Sodalitates instrueret, dirigeret, foveret. Periodicum illud, sub titulo **Sedes Sapientiae**, collata pecunia subscribentium et libero Congregationum subsidio, mense Februario anni 1926 initium sumpsit et alterutro mense in lucem prodibit, mille saltem impressis exemplaribus: inter sacerdotes, Congregationes et Secretariatum vinculum erit sociale, cujus momentum neminem latet.

In votis est simile tentare inceptum, vertente hoc anno 1925, in parte gallica Belgii: faxit Deus ut conatus nostri eundem habeant faustum successum!

J. RUTTEN S. J.

*Nota Editoris:* Laetissimi hi nuntii nobis adveniunt. Interim primus fasciculus prodiit novi periodici "Sedes Sapientiae" (Tweemaandelijksch Tijdschrift voor Leiding van Mariacongregaties, Brugge, Korte Winkel 10), qui P. Ios. Rutten dirigente optimam certe spem facit.

**De Cardinali Mercier** nuper defuncto nova epimeris sodalitia Brugensis "Sedes Sapientiae" pulcherrime narrat, quomodo Em. Cardinalis die 2 Februarii 1925 publice se Sodem professus est. Post Missam enim pontificalem simul cum alio sacerdote sene, studiorum et Sodalitatis quondam socio, ad ecclesiam Sancti Rumoldi se contulit atque ibi coram 600 juvenibus Collegii actum consecrationis renovavit, quam ante 60 annos eodem loco protulerat simul cum eodem sacerdote socio, ad magnam omnium aedificationem. Uno anno post magnus vir fato concessit. Natus die sabbati, etiam die sabbati mortuus est.

**Mt. St. Michael's, Hillyard, Wash., America).** *Academia Scholasticorum Provinciae Calif.* Philosophi nostri hujus provinciae serio omnino rebus sodalitiis cognoscendis operam navant. Paradigma enim conferentiarum nobis miserunt, quas per annum inter se disceptaturi sunt. En obiecta harum conferentiarum: De defectibus Directoris. De oratione mentali aliisque privatis Sodalibus exercitiis. De Sectione catechetica. De Sectione hospitalium et carcerum. (Notatur hic in nosocomiis Statuum Unitorum, quae numero sunt 600-700, singulis annis plus 6.000.000 aegrotos transire, quae optima occasio est Sodalibus infirmariis feminis apostolatam inter hanc ingentem turbam exercendi). De apostolatu preli. De Sectione missionaria. De Sectione auxilii parochialis.

Ex hac enumeratione cum gaudio percipere licet, Scholasticos nostros non solum ad amussim exsequi ea, quae Patrem Nostrum circa Directorum maturam formationem desiderare intellexerunt, sed etiam tempore curam impendere cognoscendis et addiscendis viis ac rationibus apostolatulatus contemporanei. Quae res id certe momentum habebit, ut Scholastici nostri simul cum studiis theoreticis utilem prospectum ad futuros labores consequantur.

**Zuerich (Helvetia).** *Labor in Congregatione virorum.* Congregatio virorum programma nobis misit consultationis generalis, quam omnes Congregationes virorum urbis Zuerich et oppidorum vicinorum habere identidem solent ad actionem sodalitiam communi consilio

promovendam. Hac vice quaestio discutienda haec fuit: *quomodo juvenes catholici organizationum juvenitium, cum adoleverint, in organizationes adultorum tradendi essent?* De hac re vir quidam laicus, membrum comitiorum municipalium, elucubrationem legit; deinde omnes, quibus placuit, sententiam dixerunt. Sub finem consultationis de operibus caritatis promovendis brevis disputatio est instituta. Vel inde vides, Congregationem bene gubernatam iniquaquam pia dulcique infantium psalmodia contineri.

**Puerto Montt (Chile).** De *Congregatione virorum et juvenum* in Collegio nostro S. Francisci Xaverii haec amice referuntur: Congregatio orta est anno 1922 sub titulo "*Stabat Mater*" et Sancti Ignatii, hodieque 83 Sodales continet.

Anno peracto Sodalium eleemosynis aedificium etsi modestum in suburbio exstructum est, seu Centrum Catechisticum, ubi diebus festis plus 100 pueri christiana doctrina imbuuntur. Pariter etiam carcere detentos menstruis visitationibus Sodales *in utroque homine* recreant. Nec omittimus folia et fasciculos catholicos per urbem spargere, ut protestantium adversemur audaciae. Hactenus plus quam 20,200 folia volitant per auras.

Faustissimum dicam Congregationi nostrae diem 2 Augusti anni 1925, cum clarissimus Antistes noster, Illmus ac Rvdms Doctor Abrahamus *Aguilera*, Ancudien-sis Episcopus, magno sodalium fideliumque stipatus concursu, in Ecclesia nostra ipse de manu R. P. Rectoris Numisma Congregationis Marianae humiliter suscipere voluit et postea duodecim novos Sodales solemniter eodem numismate sacro munivit. Episcopus tanti facit signum Congregationis, ut non modo in templo et domi, sed etiam in viis publicis urbis nostrae per integrum diem supra pectus ostendit. Directorium et Sodales omnes peramantem Episcopum Congregationis Praesidem honoris causa uno ore conclamarunt, eique artisticum Beatissimae Virginis numisma animi grati et lubentis pignus obtulerunt.

F. M. BARANERA S. J.

**Budapest (Hungaria).** *Congregatio Universitaria* "mensam S<sup>ae</sup> Theresiae a Puero Iesu" parat. Congregatio virginum in studia generalia incumbendum, ut egentiores studiorum socias a malis eiusmodi institutis retineret et simul S<sup>ae</sup> Theresiae a Puero Iesu honores augeret, mensam publicam universitariam cotidie adornari curavit, cui nobilis quaedam matrona praeest; prandium ibi ac coena cotidie minimo pretio porriguntur. A gubernio quoque carbones et farinam ad hunc finem erogaverant; 3 Sodales autem rus exierunt, ut ostiatim ob agricolis annonam mendicarent pro sociis, quae miseriorem inter ipsa studia inopemque vitam tolerant.

**Publica interrogatio** (enquête, Rundfrage) **de Congregationibus Virginum Germaniae.** Germani (ut sunt ordinis et numerorum statisticorum amatores) literis passim dimissis omnes Congregationes Virginum rogaverant, ut ad quaestiones quasdam responderent. Est enim in Bochum centrum quoddam, cui quotquot sunt in Germania Virginum Marianae associationes, adhaerent, numero omnino 3500. De archidioecesi *Coloniensi*



Köln) deinde numeri et indicationes modo statistico elaboratae in lucem prodierunt. Unde quaedam excerpere placet.

Die 1 Oct. 1923 in archidioecesi Coloniensi erant 857 Congregationes Marianae Virginum, id est aderat Congregatio in maiore parte parochiarum (quae sunt omnino 1621). De numero Sodalium et operibus piis elenchum quaesitum miserunt Congregationes 576. Harum Sodales erant numero in unum collato 134,178. Ex his quod ad aetatem Sodalium attinet, 66,617 erant 14-20 annos natae, 67,561 anno vicesimo superiores. Ad quaestionem difficiliorem: cuiusnam socialis conditionis aut occupationis singulae Sodales essent, ob difficultatem perquisitionis solae 407 Sodalitates responderunt, cum 78,111 Sodalibus; quarum 32,764 filiae familias erant, seu domi cum parentibus degunt, 8598 ancillae, 10,444 publicis officiis aut domibus mercatoriis adiectae, 10,899 industriales, 10,786 operariae, 4620 liberalium artium cultrices (e. g. magistrae). Unde apparet, Sodalitatem ad omnes fere vitae condiciones sese extendere.

Inter opera, quae Congregationes istae prosequuntur, primum locum obtinet religiosa sui formatio, maxime per s. Exercitia, per conferentias et cursus religionis et apologeticos, instructiones biblicas, Sectiones eucharisticas. Praeterea culturae muliebris practicae operam navant, cursus aut scholas frequentando de artibus domesticis (nendi, vestem sarcindi, lavandi, coquendi, infantes curandi, hygienae etc.). Exercitationes corporis (gymnastica) foventur, intra tamen modestiae christianae limites; quae res momento non caret, ubi innumerae fere societates sportivae ab adversariis coluntur, reiecto quovis pudoris sensu atque etiam "culturae nudi" deditae.

Magna cum cura optimas Sodales seligunt et excolunt ut aptae zelatrices operum catholicorum fiant; sic tempore vacationum Pentecostes 65 selectae Sodales cursum peculiarem "operariorum socialium" percurrerunt, ducibus viris summae in his rebus auctoritatis. Praeterea in singulis Decanatibus (districtibus ecclesiasticis) Praefectae aliaeque e maioribus Officialibus Congregationum singulis mensibus conveniunt ad parvum congressum.

Tali tantoque demum labore virgines illae excoluntur, in pietate foventur, ad laborem inducuntur. Neque aliunde intelligere potes, quomodo inter tot Protestantes et neopaganos, inter tot socialistas et communistas, res catholica in populo catholico Germaniae tam ubere victoriam iterum iterumque adipiscatur.

Utinam feliciores Catholici et Sodales nationum catholicarum discerent modum strenue et ordinate laborandi ab iis, qui multo maioribus impedimentis pressi in terris protestantismo infectis — in Germania, Anglia, America, Helvetia — tam laeto cum fructu laborant!

**Alexander di Luzzago** († 1602), de quo in Elencho Venerabilium Sodalium sermo est (II. pg. 78 A. O), non fuit Sodal<sup>is</sup> *Mediolani*, sed in *Brescia*, ut scribit P. Leo-

nidas Grazioli S. J. in periodico "Stella Matutina" (pg. 87, Nr. 3, 1926).

**Viennae** in Austria Congressus Directorum Congregationum totius urbis paratur his mensibus, ut P. Boegle nobis scribit; quem Congressum sequetur alter pro Sodalibus omnibus illius urbis mense Octobri instituendus.

**Buenos Aires (Argentina).** 10,000 virginum Sodalium processio. Die 8 ultimi Decembris, ut fertur, 10,000 virgines Sodales, filiae Mariae, processionem per urbem instituerunt, quod illo die illis in regionibus mensem Marianum finire solent. (*Revista Catolica*).

## TELEPHONIUM

**Centenarium Aloysianum** diligenter a multis Sodalitatumstrarum Directoribus promoveri undique nunciatur, quamvis non semper sine impedimentis superandis. Aliqui enim saeculares adeo falsam de S. Aloysio imaginem mente conceperant, ut eam ineptam fere dicitent quae iuventuti tamquam exemplar proponatur. Quam falsam de Sancto Nostro imaginem verbo et calamo corrigere nostrum est. Ipse Summus Pontifex disputationi morali Universitatis Gregorianae nuper praesidens in eundem modum sermonem habuit utque recta et iusta Aloysii imago restitueretur postulavit. Qua in re nostrae certe Congregationes et Directores harum bono exemplo aliis praeibunt, scripta vulgando et *octidua Aloysiana publica* (ut in "Acies Ordinata" mense Novembri 1925 descripsimus) instituendo.

Res Aloysianae tamen non ad nostrum Secretariatum pertinent neque a nobis scripta vel imagines petendae sunt, sed a "Comitato Aloisiano, Via del Seminario 120, Roma 19".

**De oratione mentali** Sodalium Reg. 34 agitur, non 37, uti pag. 9 anni II dicitur.

**Gratias pro obolis:** P. D. G. Recife L. 100 — P. F. S. Nürnberg L. 115,61 — P. N. O. S. Sebastian L. 93 — P. L. W. Oppeln L. 119 — P. I. G. Bilbao (Coll.) L. 100 — P. A. B. Bilbao (Dom. prof.) L. 200 — P. Q. C. Madrid L. 338 — P. E. G. Alexandria L. 125 — *Congr. Imm. Conc.* Moentilam (lava) L. 100 — P. E. M. Santiago de Cuba L. 297,60 — P. A. O. Victoria L. 150 — *Ignatiushaus* München L. 60 — P. E. G. Alexandria L. 125. — P. B. M. Pinsk L. 20 — P. I. L. Trier fr. 150. — P. I. I. S. Ocaña L. 250 — P. I. G. La Pax L. 180 — P. I. L. Belgium L. 100 — P. A. F. Milano L. 20.

Editor: **Adalbertus Bangha S. I.**

Superiorum permissu.

Romae - Ex Typographia Campitelli - Via Orazio Coclite, 50-A